

**Naalakkersuisut siulittaasuata ammaanermi oqalugiaataa tunngavigalugu oqallinneq.**

(Naalakkersuisut Siulittaasuut)

Qujanaq Naalakkersuisut Siulittaasuanut ammaanermi oqalugiaataanut.

Isumaqarpunga, oqalugiaat ataatsimoortitsisoq, suleqatigiinnissamut assammik isaassisoq nunatsinni aammalu nunanut assigiinngitsunut. Tamanna isumaqarpunga oqariartuutaasoq pingaarutilik. Suleqatigiinneq ammasuunerlu pitsaanerujuaannarput immikkoortitsinermit matoqqanermiillu.

Ullumikkut nikorfavugut Inatsisartunut martsimi qinersereernerup kingorna siullerpaamik nalinginnaasumik katersuunnerup aallartinnissaanut piareersimalluta. Isumaqarpunga, qinersisartut Inatsisartunik oqimaqatigiissunik qinersisimasut misilittagalinnik aammalu nutaanik nukissalinnik qinersinermikkut. Uanga nutaanut ilaavunga sulinissannullu qilanaarlunga. Qularutiginnigilluinnarparalu, aamma allat taamatut misigisut. Kikkuugalu aruttaluunniilli, pingaaruteqarpoq eqqaamajuaannassallugu, uatsinnut pilluta maaniinnginnatta. Maaniippugut kalaallit, uagutsinnit qinersisimasut sinnerlugit. Tamanna ataqqissavarput.

**Nunat assigiinngitsut akornanni nalornineq nunallu assigiinngitsut akornanni periarfissat**

Siullermik nunarsuarmut qissimigaalaarusuppunga paasinarsarniarlugu, piffissami sumi, ullumikkut inuunersugut. Tassami piffissaq manna, nalorninermik akerleriinnermillu annertuumik malunniuteqarpoq. Rusland soqqusaatsumik Ukrainemi saassussisaqattaarluni sorsunnermik ingerlatsivoq. Kangiani qiterlermi akerleriinneq pileruttorpoq aammalu maannakkumiit ajornerujussuanngorsinnaalluni. USA toqqaannartumik nunatsinnut siooranartuliornikuuvoq. Taakkorluinnaallu USA imminut matullutillusoq aningaasaqarnikkut politikkeqalersimapput, nunanut allanut akitsuusersuillutik, tamakkulu niuernikkut akersuunnermik aallartitsisinnaapput inuinnarnut akitigut qaffaanermik kinguneqartumik. Tamakku tamarmik annertuumik maani nunatsinni ulluinnatsinnut maannakkumiit sulii annertunermik sunniinerlussinnaapput.

Politikkikkut suliniarnitsinni pingaartuuvoq, nunat assigiinngitsut akornanni pisunut tamanut, eqqummaarinnissarput. Pingaartuuvoq, ilumoorutissallugit aammalu maani nunatsinni uagutsinnut pitsaanerpaaq aallaavigalugu iliuuseqartarnissarput.

Tassunga atatillugu isumaqarpunga tamatta, kissaatigigipput, kalaaliusugut annertunermik aalajangeeqataanerunissaq, nunat assigiinngitsut akornanni pisunut tunngatillugu. Nunarsuarmi politikikkut katersuuffiusuni nunallu tamalaat akornanni isumaqatigiinniarnernut nammineq immitsinnut nittarsaannissarput pissusissamisoorpoq. Tassani tusartuaannarsimavarput, tamanna ajornartoq,



tunngaviusumik inatsit pissutigalugu. Piffissanngorpoq, isiginnittariaatsip taassuma allanngortinniarnissaa.

Soorlu asseersuutigalugu maanna takusinnaalerparput, ataatsimiititaliap arlaannaanulluunniit pituttorsimanngitsup, ilaatigut højesteretsdommerinit pingasunit ilaasortallip, aalajangernerata kingunerigaa, Savalimmiut nunat tamalaat niuernikkut suliniaqatigiiffiannut (WTO) ilaasortanngornissaa. Tamanna isumaqarnerpa, uagut aamma Kalaallit Nunaanniittugut ilaasortanngorsinnaanitsinnik? Tassunga atatillugu aperilaarlakka Naalakkersuisut pilersaaruteqarnerisut WTO-mut ilaasortanngornissamik qinnuteqarnissaminnik?

Takunnissinnaanera malillugu aalajangiineq taanna nunat akornanni politikkikkut katersuuffiusunut aammalu immaqa nunat tamalaat akornanni niueqatigiinnernut pitsaasumik kinguneqarsinnaasutut isikkoqarluni. Demokraatini kissaatigaarput, misissorneqassasoq, tassunga atasumik qanoq annertutigisumik aalajangeeqataasinnaanerput angusinnaaneripput. Nunatut inuiaqatigiittullu akisussaaffimmik tigusinerunissatsinnut piareersimavugut.

#### **Tamat oqartussaaqataanerat, killiligaanani oqaaseqarsinnaatitaaneq pissuserissaarnerlu**

Oqartussaaqataaneq ilaatigut isumaqatigiinnginnernit aammalu taakkuninnga annissisinnaanermut sapiissutsumik ingerlaaseqarpoq. Killiligaanani oqaaseqarsinnaatitaaneq pingaartuuvoq, kiffaanngissuserli akisussaaffimmik malitseqartinneqanngitsoq ingerlaannaq pitsaanngitsumik kinguneqartarpoq. Tassunga atatillugu eqqaamassuarput, kiffaanngissuseqaratta oqaaseqarnissamut – pisussaaffiligaanngilagulli taamaaliuinnissamut. Pissuserissaarneq akornatsinni kusassaataannaanngisaannassooq. Akerlianilli pissuserissaarneq oqaloqatigiinntsinni aallaaviujuaannartariaqarpoq, assigiinngissutsigut akimorlugit immitsinnut tusarnaarsinnaaniassagatta. Ullumikkut oqaloqatigiittariaasitta annerpaartaa immaqa inuit attaveqatigiittarfiisiut ingerlanneqartarpoq. Tamannalu nutaanik periarfissiivoq, aammali ajoraluartumik kingunerisimallugu, pissuserissaarnerup tammaqqajaasarnera nipilu misigittaattunngorlunilu puffassimaartumik nipeqakkajulersarluni. Tassani tamatta suliniutigisariaqarparput immitsinnut pissuserinnerusumik oqaloqatigiillutalu allaffigeqatigiittarnissarput. Tamassuma isummersorneq pitsaanerulersissavaa, tamattalu silatunerulersilluta.

Tamanna nutaajunngilaq. Taamanili tamat oqartussaaqataanerat pinngormat – Grækenlanditoqqami – parrhesia (pareersia) eqqartorneqarpoq, toqqaannartumik nutserlugu kiffaanngissuseqarluni oqalunnissamut sapiissuseqarnermik nutserneqarsinnaasoq. Filosooffi Sokrates-ip takutippaa, ilumoortoq paasiniarneqassasoq apeqqutitigut isummersornikkullu – akerartuutit aqqutiginagit. Oqaaseq pikkunartorsuaq taanna nutaanngilinngisaannassooq: Isumassarsiat sakkortuumik isornartorsiorutsigit, inuilli pitsaasumik pissusilersorfigalugit, tassuunakkut killiligaanani oqaaseqarsinnaatitaaneq tamallu oqartussaaqataanerat nukittunerulissapput. Isummersorneq sakkortooq pissuserissaarnerlu akerleriinngillat, imminulli aallaaviupput.

Taamaattumik maani Inatsisartuni siuttuusariaqarpugut. Politikki pillugu sakkortuumik isumaqatigiinngissuteqarsinnaavugut, immitsinnulli ataqqeataqatigiinnissarput pisariaqarpoq.



# DEMOKRAATIT

Isummersortilluta piviusut aallaavigisariaqarpagut tunngavilersuutigullu tusarnaarnerusariaqarlugit. Demokraatini upperaarput, inuiaqatigiit ataatsimoornerlu nukittunerulissasut, immitsinnut nersortarutta, ataqpeqatigiilluta pingaarnertullu tamatta ataasiakkaarluta akisussaaffimmik tigusinitsigut. Maanngaaniit kajumissaarut ersarippoq: Pissuserissumik oqalugit, ataqqinnigit, iluatsissimasasilu nuannaarutigisigut. Taamaaliornikkut demokratiimut innuttaasut akornanni, inunnik attaveqaqatigiittarfikkut aammalu maani inersuarmi tatiginninneq annertusarsinnaassagatsigu.

## **Aningaasaliissutit pitsaasut, nukkiuutit ikinnerusut inuillu atugarissaarnerunerat**

Kiffaanngissuseq akisussaassuseqarnermik piumasaqaatitaqarpoq. Atugarissaarneq piginnassagutsigu ataasiakkaat inuunermikkut namminerisaminnik ilusilersuinissaannik annertunermik periarfissinnissaat kissaatigigutsigu, aningaasaqarnikkut politikimik ersarinnerusumik ingerlatsisariaqarpugut. Namminersorlutik suliffiutillit pitsaannerusunik sinaakkusertariaqarpagut, annertusarniassammata taassumalu kingunerisaanik naleqarnerulerlutik. Taamaaliorneq kingunerissavaa, innuttaasut suliffeqarfiillu pitsaannerusumik atugaqarnissaat, namminnerlu pilersitamik isertitaminnillu annertunerusumik tigumminnisinnaanerat. Tamanna ilutigalugu naleqarnerulernerq kingunerissallugu, uagut inuiaqatigiittut periarfissagissaarnerulernissarput, kiisalu pisariaqartitsinerusunik isumassuinnissarput.

Piumasaqaataavorli uagut politikikkut sapiissuseqarnissarput aningaasaliinissamut, inuiaqatigiinnik kivitsinnaasunut, aammalu sapiissuseqarnerisugut torersaanissamut, ingerlatsivinni ingerlanerliulersimasuni. Taamaattumik attaveqaasersuutigut nutartertuartariaqarpagut. Ullutsinnut naapertuuttut atorluarsinnaasullu talittarfiit mittarfiillu aqqutissaapput takornariaqarnerup naleqarnerulernissaanut taamaalillutillu suliffissanik nutaanik pilersitsinissamut nunalu tamakkerlugu akileraarutitigut isertitaqarnerulernermik pilersitsisussat.

Aammattaarlu suliffeqarfimmik pilersitsinissamut ingerlatsinissamullu ajornaannerulersitsissaagut, allaffissornerujussuaq annikillissillugu, aammali akitsuutit malittarisassallu sukannersut aallarnisaasut pitsaasunik siunnerfeqartut ipitissanngikkaat. Pinngitsoorani namminersorlutik inuussutissarsiuqartut, patajaannerusumik namminerisamillu aningaasarsiornermut tunngaviusariaqarput.

Taamatuttaaq kingunerissavaa, pisortat allaffissornerujussuata annikillissarnissaa. Uani minnerunngitsumik eqqarsaatigaara pisortat allaffissornerujussuat. Eqqarsaat taanna aamma Naalakkersuisut iserfigaat Aningaasaqarnermut inatsisissatut siunnersuuteqarnerminni, tassani siunniunneqarmat allaffissornerup annertuumik appartinnissaa. Demokraatini isumaqarpugut, tassanngaanniit iluanaarut allaffeqarfimmiit atugarissaarnermut nuunneqassasoq. Piumasaqaatigaarput, akileraartartut aningaasaataasa silatusaartumik atornissaat aammalu innuttaasunut iluaqutaasussamik.

## **Sulisinnaasut tamarmik, sulissapput**

Demokraatini aallaavipput ersarilluinnarpoq. Ataatsimooqatigiinneq naapertuilluarnermik akisussaqaatigiinnermillu toqqammaveqarpoq. Ataqqilluinnarpagut, ullut tamaasa suliaartortartut, aammali arlaannik peqquteqarnertik pillugu sulisinnaanngitsut. Akuerisinnaanngilarpulli, assaat sulisinnaasut,



kisiannili sulerusunngitsut. Isumarput unaavoq, kikkulluunniit sulisinnaasut, naparliinnarlutik pilersorneqassanngitsut, assaat tamarmik pisariaqartinneqarmata. Tamatsinnut naapertuilluarneq apeqqutaalertarpoq.

Ullumikkut ajoraluartumik imaappoq, akornatsinni inoqarmat, sulerusunngitsunik, pissusissamisoorsoralugulu inuunerminnut atugarissaarnissaminnullu akiligassaq allanut ingerlateqqitassaasutut pillugu. Ajoraluartumik sulit takujuarparput, avataaniit ilinniarsimannngitsunik tikisitsisarneq naak, april 2025 1.962 suliffissaaleqisutut nalunaarsorneqarsimagaluartut, taakkunannga 85 procent sulileriaannartut nalilerneqarsimallutik. Tamanna ersarilluinnartumik takutitsivoq, oqartussat ersarissumik piumasaqaateqartanngitsut, pilliuteqaqataasinnaasunut.

Malittarisassat pioreerput. Suliffissarsiortunut ikiorsiissutit kinguneqartitsinissamullu periarfissat qasungavallaarput. Ullumikkut itigartitsinermit sapaatit akunnerini sisamani karantænermik arfarmillu ikiorsiissumik tunineqarnermik kinguneqartarpoq.

Demokraatini isumaqarpugut, sulinissamut itigartitsinerup kingunera, sakkortunerujussuusariaqartoq. Imaattariaqarpoq, sulinissamut itigartitsineq suliffissarsiortutut ikiorsiissutit qujaannarnermik kinguneqartinneqarluni. Avataaniit sulisussanik pisariaqartitsineq annikillisissavaa, ullaallu tamaasa aalajaallutik sulitortartunut atugassarititaasut pitsanngorsassallugit taamaaliornerullu pisortat aningaasaqarniarneranut pitsanngorsaataassalluni.

Aammattaaq sakkortunerusumik iliuuseqartalernissamik siunnersuuteqarnermi pisariaqarpoq, pitsaasumik tunngavilersuinissarput, inuusuttatta suliffeqarfinnut appakaatsinnissaannut. Inuussutissarsiutitigut ilinniarnert pisariinnerulersittariaqarpagut lærlingit praktikkerfissallu amerlanerusut qulakkeerlugit. Minnerunngitsumik namminersorlutik inuussutissarsiortuni.

Ilinniaqqinnissanut aammalu pikkorissartuarnissamut aningaasaliisariaqarpuguttaaq, amerlanerit piginnaasaminnik qaffassaasinnaaniassammata siunniussaminnillu allannguisinnaatillugit, tamassuma pisariaqalerfiani.

Oqariartuut pingarneq ataasiuvoq. Sulisinnaasut tamarmik, sulissapput. Pillaaniarnerunngitsumik, akerlianilli ataqqinassuseq annertusarniarlugu inummumut ataasiakkaatut aammalu ataatsimut aningaasaqarniarnitta annertusarnissaanut.

### **Meeqqat inuusuttullu nukittuut**

Aningaasaliineq pitsaanerpaaq tassaassaaq, meeqqanut inuusuttunullu aningaasaliineq. Inuunermi toqqissisimasumik aallartissimaneq, meeqqat atuarfiat nukittoq aammalu inuusuttunut ilinniarsiit ersarissut. Ilinniarneq sulit atualernani aallartereertarpoq, meeqqerivinni sulisut meeqqat paariinnarnagit, ineriartortittarmatigut aammalu perorsaasut pikkorissut siusissukkat paasisarmatigut meeqqat,



ajornartorsiutillit, napparsimappata imaluunniit sumiginnagaasimanermik malunnaateqarsimappata. Inuiaqatigiit ikiutissanik piaartumik ikiorsiinerat, tamanut pitsaanerpaassaaq.

Meeqqat atuarfianni sulimut pikkorissuseq atugarissaarnerlu ingerlaqatigiissapput. Fagit tunngaviusut soorlu kalaallisut matematikkilu ukkatarineqarnerussapput, ikinnerit atuarfik qimattassappassuk piginnaasassaraluminnik pisariaqartunik pissarsisimanatik, kingusinnerusukkut inuusuttut suliffissaaleqinerata qaffanneranik kinguneqartartumik. Tassungalu ilutigalugu atuarfiit ulluinnarni eqaannerusumik eqqarsartariaqarlutik, timi atorlugu suliaqartitsinissamut silaannarissartitsinissamullu, tamanna ilikkagaqarnerummat, atukkat ajunngippata.

Piffissanngorpoq, ingerlaatsip allanngortinnissaa meeraq aallaavigalugu - killormuunngitsoq. Eqaatsumik sinaakkusiinissaq pisariaqarpoq, tamatumani aamma immikkut pisariaqartitsisunut. Tassani pisariaqarpoq, nikeranngitsumik qularnaarsimassagipput, ilinniartitsisut perorsaasullu ilinniaqqinnissanut pisariaqartunut peqataasinnaanissaat unammillernartut taamaattut aqunnissaannut.

Inuusuttunut ilinniakkanut tunngatillugu, anguniagaavoq taamaatiinnartartut annikillisinnissaat aammalu inunnik ilinniarsimalluartunik pilersitsinissaq. Tassani qulakkeertariaqarparput, inuusuttunut ilinniakkat inuusuttunut pilerinartuunissaat. Uani katersuunnermi Demokraatiniit siunnersuutigarpur assersuutigalugu, misissorneqassasut timersornermik toraagalimmik Qaqortumi GUX-mik pilersitsissoqarsinnaanera. Taamatuttaaq isumaqarpugut, inuusuttunut ilinniarfik Ilulissani pingaartinneqatariaqartoq.

Naggataatigut uagutsinnut pingaartuuvoq, inuussutissarsiutitigut ilinniarnert GUX-imut sanilliullugit taakkutuulli nukittuutut assigiimmillu toqqagassaasutut isigineqarnissaat. Allaannginnami, inuusuttut ilinniagaat atuagarsornerusoq pitsaannerusutut isigineqartartoq. Taamatut eqqarsartarneq qimaamisariaqarparput. Ilinniakkat tamarmik tunngaviatigut tamarmik iluatinnaateqarput. Eqqarsaatigineqarnerusariaqarpoq, inuusuttut ataasiakkaat inuiaqatigiinni inissaminnik eqqortumik nassaarnissaat.

Anguniakkattaaq pingaarnerit ersarilluinnartariaqarput. Meeqqat tamarmik minnerpaamik meeqqat atuarfianni inaarutaasumik misilitsinneq angusiffigisimasariaqarpaat, sapinngisamillu amerlanerpaat inuussutissarsiutaasinnaasumik ilinniagaqarsimasariaqarlutik. Innuttaasut ilinniarluarsimasut atugarissaarnissatsinnut tunngaviliisuususaapput, ilinniarluarsimaleriarternerpummi nukittuumik inissiffiartuinnartussaavarput. Nukik tassani ingerlasoq sapangissanngilarput.

#### **Peqqinnissaqarfik pitsaannerusorlu qanilaarnerusumillu pissuseqartoq**

Qamuuna qutsavigerusuppakka peqqinnissaqarfitsinni sulisut tamaasa. Ullut tamaasa nakorsat, peqqissaasut, peqqissaasutut assistentit, terapeutit, portørit allarpassuillu peqqinnissaqarfippur napatippaat. Tamannalu eqinnaallutik isumassuillutillu ingerlallugu. Taakkuli allanngortissinnaanngilaat, peqqinnissaqarfiup tatisimaneqarnerujussua. Innuttaasutut katitigaanitta kingunerissavaa, siunissami



amerlanerusut, isumassorneqarnermik paaqqinninnikkullu pisariaqartitsilernissaat peqqinnissaqarfitsinni. Tamanna tunngavigalugu Demokraatini isumaqarpugut, pissusissamisoortoq, ataatsimoorluta nassuerutigissallugu, ukkatarisassaq pingaarneq unaassasoq sulisunik tigumminniinnarnissaq sulisussarsiornertu. Tamanna tunngavigalugu aningaasaliissutigut ima iluarsaatissavagut, annertunerusumik sulisugut pikkorissut tigummiinnarnissaanut aammalu pikkorissunik sulisoqarnissamut. Allaffissornerujussuaq annertusassanngilarput. Tassungalu ilutigalugu taartaagallartunik akisoqisunik isumalluuteqarneq appartinneqassaaq, aningaasanik atuiffiuallaarmat napparsimasullu isumannaallisarnerannik sumiginnaanissamut ulorianartorsiortitsisinnaanera annertusineqarsinnaammat.

Taamaattumik isumarput unaavoq, suliffimmi atukkat, akissarsiat inissaqartitsineq pilerinartuaannartinneqassasut, sulisunut pissutsit pitsaasuujuaannarnissaat periarfissinniarlugu.

Tamanna pingaartuuvoq inunnut, maani nunatsinni pissutsinik pitsaanerpaanik pilersitsinissamut, arlaannik peqquteqartumik passunneqarnissamik, paaqqinninnikkut isumassorneqarnissamillu pisariaqartitsisunut. Utaqqisut allattorsimaffiat appartissavarput aammalu napparsimasunut qanigisaasunullu paasissutissiisarneq attaveqaaqatigiinnerlu pitsanngorsarlugit. Misigisaq pitsaasuullunilu toqqissisimanartuussaaq peqqinnissaqarfimmut atassuteqarnermi. Taakku saniatigut ukkatarissavarput, qanoq ililluta digitalikkut soorlu telemedicin aamma silassorissuusaaq aqutigalugit passussineq ikorfartorsinnaanerlugu.

Isumarput taamaattumik unaavoq, aaqqiissutit pingaarnertutissagigut, ulluinnarni atorineqarsinnaasut, pitsaanerusunik napparsimasut misigisaqartissagutsigit sulisullu sulinerminni iluarisimaarinninnerunissaannut iluaqutaasussat. Taakku ataqatigiilluinnarput.

### **Pikkoriffigut, aningaasarsiutigissavagut**

Demokraatit isumaqarpugut, atugarissaarnerunissamut aqqut, inuussutissarsiutini pikkoriffigineratsinnit, aningaasarsiornitsinneertussaasoq. Uani siullertut pingaarnertullu eqqarsaatigaara aalisarneq, pingaarnarpaatut iluanaarutaanerpaatullu inuussutissarsiuterput. Anguniagaq tamatigut unaasariaqarpoq annerpaamik isertitsinissaq. Taamaaliorsinnaavugut aalisarneq sunniuteqarluarnerulersinneratigut, isertitat annertusarnerisigut tunisassiornerlu inissillugu, ingerlasussanik piareersaaneq aqutsinerullu aammalu avammut niueruteqarnerup imminut akilersinnaaneruffianut. Tunisineq fabrikkillu tamanna tunngavigalugu pingaartumik inissinneqassapput ukunani, imminut akilersinnaanerusunik aalisartunut aammalu inuiaqatigiinnut. Eqqaamassuarput, aningaasat aalisarnermit pissarsiaqut amerlaneruppata, inuunerissaarnermut aningaasassaqarnerussagatta akileraarutinillu appaanissamut periarfissaqarnerulluta.

Isertitassatsinnilli nutaanik nassaarniartariaqarpugut. Uanilu takorsariaqarneq sukaq pingaartuuvoq. Takornariaqarneq imminut attassinnaasuullunilu iluanaarutaassaaq. Mittarfissuit nutaat aammalu pisarialimmik talittarfiit mittarfimmi allat ullutsinnut tulluussarneri tunngaviliisuupput tikeraanik amerlanerik tikinneqarnissatsinnut, angalanerit sivikillisarnerinut nunaqavissullu suliffeqarfiutaasa pitsaanerusunik sinaakkusernerannut. Taamaattumik isumarput unaavoq, toraagalimmik takornariamut



ataatsimut isertitaq annertusissagipput, taamatuttaarlu pinngortitaq eriagissagipput piffinnilu innuttaasut akuutillugit takornariaqarneq ilusilersorlugu. Pisortaniit ersarilluinnartunik sinaakkusiinissamik piumasagaataavoq sullissisullu kiffaanngissuseqarlutik misigisaqartitsinissaannut, tikeraat nangaajallannguaratik akilerumasaannut.

Inaarutaasumillu aatsitassaniit isertitaqassaagut. Demokraatit isumaqarput, nunap ataaniittut pisuussutit naleqanngilluinnartut, uninngaannarunik. Isertitat aatsaat aallartissapput, suliniutit piviusunngortinneqarnerisigut. Taamaattumik inatsisit sulianillu ingerlatsisut sakkortunerusariaqarput sukkanerullutillu, ullumikkut aningaasarsiornissatsinnut kigaalaaqutaasunut suliniutinullu unitsitsisartunut. Oqimaqaatigiinneq ersarissaq tassaavoq: Aningaasarsiussaagut aningaasaliisussat qimarratsinnagit. Kinaluunniimmi aningaasaliiumajunnaangilaq, aningaasaliinissaq imminut akilersinnaanissaa ilimanangippat.

Inuussutissarsiutit akimorlugit taamatut tamarmik inernejarsinnaapput. Attaveqaasersuutitut, nunamik ammaassisunut aningaasaliinissatsinnut sapiissuseqartariaqarpugut aammalu sinaakkutininik eqqortunik pilersitsisinnaalluta, namminersortut aningaasarsiorfigisinnaasaannik. Naatsumik oqaatigalugu aalisarnermiit isertitaqarnerusariaqarpugut, takonarissamit ataatsimit aningaasanik amerlanernik isertitsisariaqarpugut aammalu aatsitassaniit tunisassiornermut toqqammavissamik pilersitisariaqarpugut, royalty-mik aammalu akileraarutitigut isertitassanut qulakkeerinnittussamik. Qanorluunniit nunatut allatut ajornartumik aningaasanik amerlanernik isertitsisariaqarpugut.

#### **Akit qaffannerat avataaninganeerpoq. Misillerfingaarpullu**

Akit qaffannerujussuat ulluinnarni uagut toqqagarinngilarput. Ajoraluartumillu aamma, nakkutigisinnaanagu. Akinik qaffaanerit nunani allani pissutsinik assigiinngitsunik peqquteqarput, aammalu tamanna nunani allani soorunami malugineqarluni. Tamanna oqaatigereerlugu, soorunami uagut politikkeritut suliasaraarput paasiniassallugu, qanoq iliorsinnaanersugut, akinik qaffaanerit taama annertutigisumik eqquinnginnissaannut. Imaluunniit pitsaanerusumik: Qanoq ililluta qulakkeersinnaaneripput, ulluinnarni atortakkat allat innuttaasunut akikinnerulersinnaaneri.

Uani isiginiarsinnaavarput piffissanngunnginnersoq internet- aamma tele unammilleqatigiinnermut ammaassinissaq. Pisiassat maani nunatsinni neqeroorutigisagut akisunerullutillu pitsaannginnerummata nunani allanit. Eqqarsaatersuutigineqarsinnaavoq, unammilleqatigiinnerulernerup nunatsinni pisiassatigut akikinnerulersissinnaagai.

Taamaapporlu angallassineq, Royal Artic Line-p kisermaassaa. Akikinnerulissaqqooqisoq tassani unammillerteqaleraanni?

Alla politikkikkut iliuuserisinnaasarput unaavoq, qulakkeernissaa, akileraarutit akitsuutillu qaffannaveersaarnissaat, akisuninngortitsinnginnissaq anguniarlugu.



# DEMOKRAATIT

## **Atituumik isumaqatigiissutit innuttaasunut iluaqutaasussanngorlugit**

Demokraatit uunga katersuunnermut iserput piumassuseqarluarlutik atituumik attanneqarsinnaasunillu aaqqiissutissanik nassaarnissamut. Isumarput unaavoq, politikki pitsaanerpaamik ingerlanneqartartoq, partiit amerlanerpaat naggataatigut inernerani takuneqarsinnaagaangamik. Taamaattumik akimut amerlanerussuteqarsinnaanermik ujartuijussaagut. Tamanna isumaqatigiinnginnerit pinngitsoortinniaannarlugit pinnani, ajornartorsiutilli ataatsimoorluni qaangernissaannut aalajangikkallu eqqissisimanermik pilersitsinissaat, ukiorpassuarni atuuttussanik.

Demokraatit isumaqarput, atituumik isumaqatigiissutit innuttaasunut neriorsuutaasut, uagut aalajangiisaartutut ataatsimoorluta anguniagaqartugut ataatsimullu sinaakkusersuisugut. Assapput tamanut isaapparput aaqqiissuseqqiinerit aalajangerinnerillu annertuut tamarmik aatsaat paasineqarlutik, akuerineqarlutik atulersinneqartarmata, arlallit pigisutullusooq misigigaangatsigit.

Piviusumi aamma isumaqarpoq, aalajangiinerni ersarissuliornerrunissaq piumagatsigu aammalu akuutitsinerunissarput avataaniit isummersuutiniq tigusaqarnissatsinnut. Taamaattumik neriuppugut, innuttaasut, kommunit, inuussutissaarsiutillit sulisullu piviusumiit ilisimasaminnik tunioraasassasut, aalajangikkagut piviusumiit aallaaveqarsinnaaqullugit.

## **Ataatsimoorluta inerniliisa innuttaasunut iluaqutaasussanik**

Nunarput inuilu politikkimik politikkerinillu, suleqateqarnissaminnut sapiissuseqartunik aammalu naapeqatiginnissinnaanermik isumaqatigiissusiorsinnaanermillu sapiissuseqartunik peqartariaqarput. Tamanna tunngavigalugu Demokraatit uunga katersuunnermut aggerput ataasiinnarmik neriorsuutissaqarlutik:

Atituumik inerniliinernik ujartuerusuppugut, piviusumi attanneqarsinnaasunik, nalilersortikkusuppugullu, inuit inuuneranni allannguuteqartoqarsimanersoq misigisimaneeraat aallaavigalugu.

Anguniagarput tassaavoq inuiaqatigiit, kiffaanngissutsimik akisussaaffimmillu ingiaqatigiisitsisut, amerlanerusut imminnut napatinnissaminnik periarfissinneqartut, nukittunerpaat pisariaqartitsisunut isumaginnissinnaallutik. Takorluuisinnaanermik pisariaqartitsivoq aammalu sakkortuunik inerniliisinnaanernik. Sapiissuseqartariaqarpugulli taamaaliornissamut. Tamannami, qinigaassutigisimavarput.

Demokraatit tamanna tunngavigalugu partiinut tamanut assammik isaassipput.

Ataatsimoorluta ilungersunartunik aalajangiisa. Ataatsimoorluta akisussaaffimmik tigusisa. Oqallittarnermik pilersitsisa, isumaqatigiinngissutit maligassiuisunngortillugit ilumikkersimanerminngarniit. Anguniartigu, una katersuunneq eqqaamaneqassasooq katersuunnertut, toraakkatsinnik allannguineramik suleqatigiinnermillu toqqaasimanitsinnut akerleriinneq pinnagu. Ullumikkut aallartitta.



Neriuppunga pitsaasumik ilumoortumillu oqallittoqassasoq ullumikkut aammalu katersuunnerup sinnera tamaat.

Qujanaq oqaaseqarsinnaagama